

Na osnovu člana 6. Statutarne odluke o organizaciji Grada Tuzla u skladu sa Ustavom Federacije Bosne i Hercegovine ("Službeni glasnik Grada Tuzla", broj 1/14, 3/15, 7/15 i 12/15) (u daljem tekstu: Statutarna odluka), člana 26. i 127. Statuta općine Tuzla ("Službeni glasnik općine Tuzla", broj 2/99, 9/00, 2/08 i 12/09), koji se u skladu sa članom 25. Statutarne odluke, primjenjuje do donošenja Statuta Grada Tuzla i člana 99. Poslovnika Gradskog vijeća Tuzla ("Službeni glasnik Grada Tuzla", broj 9/97), Gradsko vijeće Tuzla na sjednici održanoj dana 22. decembra 2017. godine, donosi

REZOLUCIJU
O ZAŠTITI USTAVNOSTI, ZAKONITOSTI, LJUDSKIH PRAVA, PRAVA NA
DOSTOJANSTVO I NA RAD U NORMALNIM USLOVIMA, GRADSKOGA VIJEĆA I
GRADSKIH SLUŽBI GRADA TUZLA

1. Gradsko vijeće, gradonačelnik i gradske službe obavezni su postupati u skladu sa Ustavom, zakonima i podzakonskim aktima, kao i u skladu sa međunarodnim konvencijama. U svom radu i odlučivanju, dužni su voditi računa o jednakoj zaštiti ljudskih prava, dostojanstva i prava na integritet svakog čovjeka. Svaki čovjek ima pravo na slobodu, dostojanstvo i fizički i duhovni integritet, sve u skladu sa poveljom o ljudskim pravima EU i drugim međunarodnim dokumentima.
2. Tako i svi vijećnici gradskog vijeća, gradonačelnik i svaki državni službenik i namještenik, imaju pravo na zaštitu slobode, dostojanstva, fizičkog, duhovnog i profesionalnog integriteta, što podrazumijeva, između ostalog rad i odlučivanje u normalnim uvjetima, tj. da bude zaštićen od bilo kakvog nezakonitog pritiska, grubog vrijeđanja i zlostavljanja, kao i od drskog i bezobzirnog ponašanja i ugrožavanja ljudskih prava i sloboda, kao i građanskog mira.
3. Gradsko vijeće Tuzla osuđuje svako djelo i svaki pokušaj izvršenja djela iznude, odnosno ucjene prema bilo kome, pa i vijećnicima, gradonačelniku, nosiocima izvršnih funkcija, svim uposlenicima, pa i uposlenicima u javnom sektoru, novinarima itd., dakle, osuđuje svačiju prijetnju ili ozbiljnu prijetnju, bilo kome da će ispaštati, ukoliko ne pristane da učini nešto na štetu tuđe imovine u konkretnom slučaju na štetu javne imovine tj. ne pristane iznudu, odnosno ucjenu.
4. Gradsko vijeće Tuzla izražava protivljenje svakoj zloupotrebi prava na slobodu govora, a posebno učinjenoj za govornicom gradskog vijeća Tuzla ili saopštenjima u medijima, s cijelom realizacijom ucjene, odnosno iznude (samostalno ili pomoću grupe) i drugih nezakonitih radnji prema vijećnicima, gradonačelniku, nosiocima izvršne vlasti, državnim službenicima i namještenicima, a sve u nezakonitom cilju usmjerenom ka ostvarivanju protivpravne imovinske i lične koristi.
5. Gradsko vijeće Tuzla će promptno reagovati, kako bi se spriječila svaka zloupotreba prava na slobodu govora radi povrede slobode i prava drugoga, i ostvarivanja Ustavom i zakonom nedopuštenih ciljeva i u tom smislu će se pristupiti donošenju izmjena i dopuna Poslovnika Gradskog vijeća i Kodeksa ponašanja izabranih dužnosnika-vijećnika u Gradskom vijeću Tuzla, sve sa ciljem da se bilo koji vijećnik, gradonačelnik, predstavnik izvršne vlasti, državni službenik i namještenik, novinar, kao i bilo ko drugi, ne ometa u radu u normalnim uslovima, a posebno ne sprečava u izvršavanju zakonom propisanih poslova i zadataka.
6. Gradsko vijeće Tuzla neće nikome dopustiti da vijećnici, gradonačelnik, državni službenici i namještenici, budu izloženi pritiscima koji su zabranjeni Ustavima BiH, Federacije BiH i Tuzlanskog kantona, važećim zakonima, Međunarodnim konvencijama, a posebno zabranjeni Krivičnim zakonodavstvom.
7. Gradsko vijeće Grada Tuzla, očekuje od Tužilaštva BiH, Tužilaštva Federacije BiH, kao i Tužilaštva TK, zaštitu gradskih vijećnika, gradonačelnika, gradskih službi, javnih preduzeća i javnih ustanova, od nelegalnog i bezobzirnog pritiska, kojem je lokalna vlast u Tuzli izložena, a sve zato što ne pristaje podleći nelegalnim, bezobzirnim i zakonom zabranjenim ucjenama, prijetnjama i pritiscima sa ciljem iznude, i to radi ostvarivanja protivpravne imovinske i lične koristi, a na štetu javne imovine i javnog interesa.

GRAD TUZLA
GRADSKO VIJEĆE

Broj: 01-05-11762-2017

Tuzla, 22. decembra 2017. godine

PREDSJEDAVALAČI

Dr.med.sci. Aleksandar Vujadinović